

## देव-शास्त्र-गुरु पूजन

(पं. दयानारायणजी कृत)

(अडिल्ल)

प्रथम देव अरहंत सुश्रुत सिद्धान्त जू ।  
गुरु निरग्रंथ महंत मुकतिपुर-पंथ जू ॥  
तीन रतन जगमाहिं सु ये भवि ध्याइये ।  
तिनकी भक्ति-प्रसाद परम-पद पाइये ॥

(दोहा)

पूजों पद अरहंत के, पूजों गुरुपद सार ।  
पूजों देवी सरस्वती, नित प्रति अष्ट प्रकार ॥

ॐ ह्रीं श्री देव-शास्त्र-गुरुसमूह! अत्र अवतर अवतर संवौषट् ।

ॐ ह्रीं श्री देव-शास्त्र-गुरुसमूह! अत्र तिष्ठ तिष्ठ ठः ठः ।

ॐ ह्रीं श्री देव-शास्त्र-गुरुसमूह! अत्र मम सन्निहितो भव भव, वषट् ।

(हरिगीतिका एवं दोहा)

सुरपति उरग नरनाथ तिन करि, वन्दनीक सुपदप्रभा ।  
अति शोभनीक सुवरण उज्ज्वल, देख छवि मोहित सभा ॥  
वर नीर क्षीर-समुद्र घट भरि, अग्र तसु बहुविधि नचूँ ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ ॥

मलिन वस्तु हर लेत सब, जल-स्वभाव मल छीन ।

जासों पूजों परमपद, देव-शास्त्र-गुरु तीन ॥

ॐ ह्रीं श्री देव-शास्त्र-गुरुभ्यो जन्मजरामृत्युविनाशनाय जलं निर्वपामीति स्वाहा ।

जे त्रिजग-उदर मँझार प्राणी, तपत अति दुद्धर खरे ।

तिन अहित-हरन सुवचन जिनके, परम शीतलता भरे ॥

तसु भ्रमर-लोभित घ्राण पावन, सरस चन्दन घसि सचूँ ।

अरहंत श्रुत-सिद्धान्त गुरु-निर्ग्रन्थ नित पूजा रचूँ ॥

चंदन शीतलता करै, तपत वस्तु परवीन ।

जासों पूजों परमपद, देव-शास्त्र-गुरु तीन ॥

ॐ ह्रीं श्री देव-शास्त्र-गुरुभ्यः संसारतापविनाशनाय चन्दनं निर्वपामीति स्वाहा ।

यह भव-समुद्र अपार तारण, के निमित्त सुविधि ठई।  
अति दृढ़ परम पावन जथारथ, भक्ति वर नौका सही॥  
उज्ज्वल अखंडित सालि तंदुल, पुंज धरि त्रयगुण जचूँ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ॥  
तंदुल सालि सुगंधि अति, परम अखंडित बीन।  
जासों पूजों परमपद, देव-शास्त्र-गुरु तीन॥

ॐ ह्रीं श्री देव-शास्त्र-गुरुभ्योऽक्षयपदप्राप्तये अक्षतान् निर्वपामीति स्वाहा।  
जे विनयवंत सुभव्य-उर-अंबुज प्रकाशन भानु हैं।  
जे एक मुख चारित्र भाषत, त्रिजग माहिं प्रधान हैं।  
लहि कुन्द-कमलादिक पहुप, भव-भव कुवेदन सों बचूँ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ॥  
विविध भाँति परिमल सुमन, भ्रमर जास आधीन।  
जासों पूजों परमपद, देव-शास्त्र-गुरु तीन॥

ॐ ह्रीं श्री देव-शास्त्र-गुरुभ्यः कामबाणविध्वंसनाय पुष्पं निर्वपामीति स्वाहा।  
अति सबल मद-कंदर्प जाको, क्षुधा-उरग अमान है।  
दुस्सह भयानक तासु नाशन, को सुगरुड़ समान है।  
उत्तम छहों रस युक्त नित, नैवेद्य करि घृत में पचूँ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ॥  
नानाविधि संयुक्तरस, व्यंजन सरस नवीन।  
जासों पूजों परमपद, देव-शास्त्र-गुरु तीन॥

ॐ ह्रीं श्री देव-शास्त्र-गुरुभ्यः क्षुधारोगविनाशनाय नैवेद्यं निर्वपामीति स्वाहा।  
जे त्रिजग-उद्यम नाश कीने, मोह-तिमिर महाबली।  
तिहि कर्मघाती ज्ञानदीप-प्रकाशज्योति प्रभावली।  
इह भाँति दीप प्रजाल कंचन, के सुभाजन में खचूँ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ॥  
स्व-पर प्रकाशक ज्योति अति, दीपक तमकरि हीन।  
जासों पूजों परमपद, देव-शास्त्र-गुरु तीन॥

ॐ ह्रीं श्री देव-शास्त्र-गुरुभ्यो मोहांधकारविनाशनाय दीपं निर्वपामीति स्वाहा।

जो कर्म-ईंधन दहन अग्निसमूह-सम उद्धत लसै ।  
वर धूप तासु सुगंधिताकरि, सकल परिमलता हँसै ॥  
इह भाँति धूप चढ़ाय नित भव ज्वलन माहिं नहिं पचूँ ।  
अरहंत श्रुत-सिद्धांत गुरु-निर्ग्रन्थ नित पूजा रचूँ ॥

अग्निमाहिं परिमल दहन, चंदनादि गुणलीन ।

जासों पूजों परमपद, देव-शास्त्र-गुरु तीन ॥

ॐ ह्रीं श्री देव-शास्त्र-गुरुभ्योऽष्टकर्मविध्वंसनाय धूपं निर्वपामीति स्वाहा ।

लोचन सुरसना घ्राण उर, उत्साह के करतार हैं ।  
मोपै न उपमा जाय वरणी, सकल फल गुणसार हैं ।  
सो फल चढ़ावत अर्थपूरन, परम अमृतरस सचूँ ।  
अरहंत श्रुत-सिद्धांत गुरु-निर्ग्रन्थ नित पूजा रचूँ ॥

जे प्रधान फल-फल विषै, पंचकरण-रस-लीन ।

जासों पूजों परमपद, देव-शास्त्र-गुरु तीन ॥

ॐ ह्रीं श्री देव-शास्त्र-गुरुभ्यो मोक्षफलप्राप्तये फलं निर्वपामीति स्वाहा ।

जल परम उज्ज्वल गन्ध अक्षत, पुष्प चरु दीपक धरूँ ।  
वर धूप निर्मल फल विविध बहु, जनम के पातक हरूँ ।  
इह भाँति अर्घ्य चढ़ाय नित भवि, करत शिव-पंकति मचूँ ।  
अरहंत श्रुत-सिद्धान्त गुरु-निर्ग्रन्थ नित पूजा रचूँ ॥

वसुविधि अर्घ्य संजोय के, अति उछाह मन कीन ।

जासों पूजों परमपद, देव-शास्त्र-गुरु तीन ॥

ॐ ह्रीं श्री देव-शास्त्र-गुरुभ्योऽनर्घ्यपदप्राप्तये अर्घ्यं निर्वपामीति स्वाहा ।

## जयमाला

(दोहा)

देव-शास्त्र-गुरु रतन शुभ, तीन रतन करतार ।

भिन्न-भिन्न कहूँ आरती, अल्प सुगुण विस्तार ॥१॥

(पद्धति छंद)

चउ कर्मसु त्रेसठ प्रकृति नाशि, जीते अष्टादश दोषराशि ।  
जे परम सुगुण हैं अनंत धीर, कहवत के छ्यालिस गुणगंभीर ॥२॥  
शुभ समवशरण शोभा अपार, शत इन्द्र नमत कर सीस धार ।  
देवाधिदेव अरहन्त देव, वन्दौं मन-वच-तन कर सुसेव ॥३॥  
जिनकी धुनि है ओंकाररूप, निर-अक्षरमय महिमा अनूप ।  
दश-अष्ट महाभाषा समेत, लघु भाषा सात शतक सुचेत ॥४॥  
सो स्याद्वादमय सप्तभंग, गणधर गूँथे बारह सुअंग ।  
रवि-शशि न है सो तम हराय, सो शास्त्र नमों बहु प्रीति ल्याय ॥५॥  
गुरु आचारज उवझाय साधु, तन नगन रत्नत्रय निधि अगाध ।  
संसार देह वैराग धार, निरवांछि तपै शिव-पद निहार ॥६॥  
गुण छत्तिस पच्चिस आठ-बीस, भव-तारन-तरन जिहाज ईस ।  
गुरु की महिमा वरनी न जाय, गुरुनाम जपों मन-वचन-काय ॥७॥

ॐ ह्रीं श्री देव-शास्त्र-गुरुभ्योऽनर्घ्यपदप्राप्तये जयमालामहाऽर्घ्यं निर्वपामीति स्वाहा ।

(सोरठा)

कीजे शक्ति प्रमान, शक्ति बिना सरधा धरै ।  
'द्यानत' सरधावान, अजर-अमर पद भोगवै ॥८॥

(पुष्पाञ्जलिं क्षिपेत्)

### भजन

अब प्रभु चरण छोड़ कित जाऊँ ।  
ऐसी निर्मल बुद्धि प्रभु दो, शुद्धातम को ध्याऊँ ॥टेक॥  
सुर नर पशु नारक दुख भोगे, कबतक तुम्हें सुनाऊँ ।  
बैरी मोह महा दुख देवे, कैसे याहि भगाऊँ ॥अब॥  
सम्यग्दर्शन की निधि दे दो, तो भवभ्रमण मिटाऊँ ।  
सिद्ध स्वपद को प्राप्त करूँ मैं, परम शान्त रस पाऊँ ॥अब॥  
भेदज्ञान का वैभव पाऊँ, निज के ही गुण गाऊँ ।  
तुम प्रसाद से वीतराग प्रभु, भवसागर तर जाऊँ ॥अब॥